

Fellabæ 15. janúar 2024

Sent á: Sveitarstjóra Múlapings, sveitarstjórn Múlapings og fræðslustjóra Múlapings.

Erindi frá starfsfólki Fellaskóla varðandi húsnæðismál skólans

Við viljum lýsa reiði okkar og furðu á vinnubrögðum meirihluta sveitastjórnar/fjölskylduráðs Múlapings varðandi húsnæðismál Fellaskóla. Þrengt hefur verulega að allri starfsemi skólans undanfarin ár vegna breyttra staðla og viðmiða um skólastarf. Vegna þessa gripum við tækifærið þegar okkur bauðst að færa list- og verkgreinar yfir í fyrrum aðstöðu Hádegishöfða á síðasta ári. Það húsnæði hefur leyst aðstöðuvanda Fellaskóla varðandi þessar kennslugreinar að hluta til, a.m.k. tímabundið. Þessi flutningur hefur kostað rót fyrir nemendur og miklar tilfærslur á húsgögnum, vélum og efniviði, auk þess sem margt hefði þurft að framkvæma í því húsnæði til þess að það myndi gagnast að fullu, húsnæðið er t.a.m. ekki löglegt fyrir vélar til smíðakennslu og heimilisfræði. Nú berst það okkur til eyrna að við munum ekki halda því húsnæði og teljum ófaglega að því máli staðið, við eigum t.d. ekki að þurfa að fréttast af slíkum málum út í bæ. Mikilvægt er að hafa festu í starfsemi grunnskóla. Hringlandaháttur sem þessi er afar óheppilegur fyrir nemendur og faglegt starf skólans sem starfsfólk reynir af mesta mætti að halda uppi. Að missa húsnæðið myndi þýða verulega röskun á skólastarfinu. Samkvæmt aðalnámskrá ber grunnskólum skylda til þess að kenna list- og verkgreinar:

Samkvæmt lögum eiga allir nemendur rétt á námi við hæfi í grunnskólum, bæði bóklegu námi, verk- og listnámi og sveitarfélögum er skylt að sjá nemendum fyrir viðeigandi námstækifærum hvernig sem á stendur um atgervi þeirra til líkama og sálar, félagslegt og tilfinningalegt ásigkomulag eða málþroska. (<https://adalnamskra.is/adalnamskra-grunnskola/kafli-4>)

Gæta ber þess að jafnvægi sé milli bóklegs náms og verklegs. Bæði hugur og hönd hafa mikilvægu hlutverki að gegna þegar nemandi eflir með sér alhliða þroska. Þess skal gætt að ekki halli á verklegt nám þegar skólastarf er skipulagt. Þetta á bæði við um hlutfall bóklegra og verklegra greina en einnig um vinnulag og viðfangsefni innan hversar námsgreinar frá upphafi til loka grunnskóla. (<https://adalnamskra.is/adalnamskra-grunnskola/kafli-6>)

Út frá áherslupáttum námskrár í lögum skal hafa jafnvægi milli bóklegs náms og verklegs og þess gætt að ekki halli á verklegt nám þegar skólastarf er skipulagt. Það á einnig við um skipulag valnámskeiða. Því er gert ráð fyrir að allt að helmingur valstunda sé bundinn list- og verktengdu námi. (<https://adalnamskra.is/adalnamskra-grunnskola/kafli-8>)

Ásamt þessum tilvitnunum er heill kafli í aðalnámskrá um list- og verkgreinar, menntagildi þeirra og hæfniviðið.

Starfsfólk Fellaskóla hefur sýnt vilja og metnað til þess að sinna list- og verkgreinakennslu vel og hefur lagt á sig ómælda vinnu til þess að „gera gott úr stöðunni hverju sinni“. Nú þykir okkur mikið meira en nóg komið.

Til fjölda ára hefur skólinn sýnt hófsemi og langlundargeð gagnvart þrengslum og aðstöðuleysi: hér eru rými fyrir nemendur of fá, vinnuaðstaða kennara lítil sem engin, skortur á rýmum til funda og viðtala, aðstaða fyrir utan að komandi sérfræðinga ekki til staðar sem og afdrep fyrir nemendur í vanda. Við höfum átt farsælt samstarf við tónlistarskólann og viljum hafa hann innan veggja skólans en ljóst er að enn á ný þrengir að starfsemi beggja skólanna. Í mörg ár hefur verið bent á þörfina á því að byggt verði ofan á nýrri hluta Fellaskóla en það ávallt lent neðar í forgangs röðinni.

Faglegt starf grunnskóla, aðbúnaður nemenda og starfsfólks getur ekki farið eftir pólitískum duttlungum hverju sinni og að sífellt sé verið að greina þörf en ekki staðið við þær niðurstöður sem líta dagsins ljós. Skólastarf byggir að miklum hluta á stöðugleika. Við gagnrýnum það hve lítið faglegt samráð virðist vera haft við yfirmann fræðslumála sem og stjórnendur og starfsfólk Fellaskóla.

Með þessu bréfi skorum við á sveitarstjórn að snúa við áðurnefndri ákvörðun meirihlutans/fjölskylduráðs, í ljósi ófaglegra vinnubragða. Við skorum jafnframt á sveitarstjórn að vinna að því að tryggja varanlega lausn á aðstöðu til list- og verkgreina í Fellaskóla með samtali við stjórnendur og starfsfólk skólans.

Starfsfólk Fellaskóla